



Ang
Bautismo
Sa
Ciahum

Si Jesus nagsaad sa Iyang mga tinon-an nga Siya magabautismo kanila sa Balaang Espiritu. Mga Buhat 1:4,5,8. Kining maong bautismo sa gahum lahi sa bautismo sa tubig, tungod kay si Jesus magabautismo kanila dili sa tubig kon dili sa Balaang Espiritu. Kining bautismo sa gahum dili alang sa pagsulod sa ginghari-an sa Dios, kon dili kini mao ang pagpasul-ob nila sa ila sa gahum sa pag-alagad, ug gahum sa pag-atubang sa dagkung mga kasamok nga moabut. Lukas 24:49.

Ang saad mahitungod sa Espiritu gihatag sa Guinoo alang sa iglesia sa tanang kaliwatan (Mga Buhat 2:38,39) tungod kay ang mga Cristohanong tumotoo nagakinahanglan kanunay sa gahum sa Espiritu alang sa pag-alagad ug pagtuman sa Dakung Kasugo-an sa pagsangyaw sa Maayong Balita ngadto sa tibuok nga kabuhatan. Marcos: 16:15. Ug magapadayon sila sa pagkinahanglan niing gahum sa gasa aron sa paglig-on sa iglesia. 1 Mga Taga-Corinto 12-14; Mga Taga-Roma 12:4-8.

Karon, atong tan-awon ang mga nagakalain-lain nga panghitabo diin gikinahanglan nato ang pagkapuno sa gahum sa Balaang Espiritu.

1. Sa unang iglesia, sa diha mi-abot ang mga kasamok tungod sa matag adlaw-adlaw nga pangapod-apod sa mga kabuhian, ang mga apostoles nagapili ug pito ka tawo nga “puno sa Espiritu ug sa kinaadman” nga makahimo sa paghusay sa mga kagubot ug maantigong mopasag-uli sa kalinaw. Ang iglesia karong panahona nagakinahanglan gayud ug mga tawo nga puno sa espirituhanong gahum ug kinaadman nga maantigong modala sa kalinaw ug sa kahusay sa panahon sa kagubot.

2. Si Jesus miingon, “Apan kamo magadawat hinoon ug gahum sa diha nga kakunsaran na kamo sa Espiritu Santo; ug kamo mao unya ang akong mga saksi.” Mga Buhat 1:8. Mahinungdanon kaayo ang paghatag sa atong mga testimonio mahitungod sa atong Ginoong Jesu-Cristo. Makita kini bisan nga ang mga pulong “pagpamatuod” o

“pagpadayag,” ug “saksi” makaplagaan nga adunay kapin sa usa ka gatus ka pulong diha sa Bagong Tugon. Kadtung nga naningkamot gayud sa pagpamatuod niining usa nga ginganlan ug “Kahibulongan” masayod gayud sa panginahanglan sa gahum sa Espiritu, dili lamang sa pagsaksi kon dili sa paghatag usab ug gahum kaniadtong nagakinahanglan sa kadasig ug kaisug. Mga Buhat 4:29-33.

3. Ug dugang pa niini, nagakinahanglan kita sa gahum sa pagbansay sa atong pagtuo sa diha kita tawagon sa pag-ampo alang sa uban ug sa mga tawo nga adunay mga sakit. Sa Dakung Sugo ni Jesus, Siya miingon, “Ug kanila nga motoo maganunot kining maong mga ilhanan: ...ang mga masakiton pagapandungan nila sa ilang mga kamot, ug mangaayo sila.” Mga Buhat 16:17a, 18b. Sa diha nga ginalutos ang mga tumotoo sa Jerusalem sila ming-ampo nga nagaingon “Ginoo ituyod mo ang imong kamot sa pag-ayo.” Ug atong mabasa mahitungod kang Esteban sa Mga Buhat 6:5,8 nga siya usa ka tawo nga “puno sa pagtoo ug sa Espiritu Santo” ug “puno sa grasya ug gahum.” Siya nagabuhat ug dakung kahibulongan ug mga milagro taliwala sa mga katawhan. Tingali dili kitang tanan mahimong moderno nga Esteban, apan kitang tanan may higayon nga mahimong mga magtotoo nga puno sa Espiritu Santo ug lyang gahum nga pagagamiton sa Guinoo sa mga buluhaton nga lyang gitinguha.

4. Kita usab nagakinahanglan sa gahum sa Espiritu Santo nga motabang sa atong mga pag-ampo. Yano lamang nga kita adunay mga kaluyahon sa pag-ampo. Sumala pa ni Apostol Pablo sa Roma 8:26,27: “...kita ugod dili makamaong moampo sa hustong inampoan.” Apan, dili kita magakaluya tungod kini maoy mga paagi nga kita makigsulti sa atong langitnong Amahan. Ug ang Balaan Espiritu magahatag ug tabang aron kita makamaong moampo sa hustong inampoan. Kita nasayod nga ang pag-ampo nga dinihog sa Espiritu Santo labaw sa tawhonong kahibalo, ug “ang Espiritu mao ang mangunay sa

pagpangamoyo alang kanato uban ang laglum nga mga pag-agulo nga dili arang malitok sa pulong.”

Tingali karon, higala, mangutana ikaw, “Unsaon ko sa pagdawat sa bautismo sa Espiritu ug sa gahum?”

1. Una, kinahanglan mobati ikaw sa espirituhanon nga kagutom ug tinguha sa pagpapuno ug pag-alagad sa Dios, kay ang katuyoan sa bautismo sa gahum mao ang Cristohanong pag-alagad ug pagsaksi alang sa Guinoo.

2. Ikaduha, pangayo niini. Sa Lukas 11:13, atong mabasa: “...unsa pa gayud ka labaw pa sa langitnong Amahan nga mohatag sa Espiritu Santo ngadto sa mga nagapangayo kaniya.” Pangayo ug kini igahatag kanimo.

3. Ikatulo, pangayo ug tabang sa pag-ampo sa pastor, anciano, o magbubuhat sa iglesia nga puno sa Espiritu Santo. Paghangyo sa pagpandong sa ilang mga kamot kanimo sa ngalan ni Jesus. Atong makaplagan ang maong pamaagi sa Buhat 8:17; 9:17; 19:6.

4. Ikaupat, sa kanunay magatambong ikaw sa mga pagtigum sulod sa imong simbahan diin ang mga tawo puno sa Espiritu. Kon ugaling wala ikaw ug kaugalingong simbahan nga imong kaadtoan, pangita ug dapit sa pagsimba diin ang mga tawo nakadawat gayud sa kahupnganan sa Espiritu ug diin nagapang-alagad ug nagasaksi.